

Famia y amigo a recorda Toty Arends cu un anochi di musica

Diasabra ultimo, famia y amigo di conocido musico, pintor, locutor y periodista Toty Arends a record’e cu un anochi di musica organisa pa su amigo Tula Mademilia. Tambe a desplega algun di e pinturanan di e artista multi-facetico aki.

Durante e encuentro aki, facilita pa UNOCA y presenta pa Percy Jeandor, un trio musical consistiendo di Tula na piano, Anderson Bahamon na bajo y Aaron Giel na cuarta a deleita esnan presente tocante e melodianan bunita com-
poni pa Toty Arends,

manera Bonnie, Maria Elizabeth, Baba, Cayenna, y Luna di Andicuri. Talentoso cantante Oriana Geerman a interpretar tres cantica, esta Mi Tin Mester Di Bo, Speranza y Bandera Leal.

Entre esnan presente tabata famia di Toty: su yiunan muhe Vivianne, Virginia y Veronica, su nietanan Pilar y Veronica, y su bisanieta Madeline. Ademas e anochi a conta cu presencia di amigonan di musica y prensa, manera Maybelline Arends, Emile Kelkboom, Edgard Kelkboom, Carlos Bislip y hopi mas.

Vivianne Arends, yiu di Toty, a presenta e biografia di e artista multi-facetico. Den su discurso, el a bisa: “Awe nos ta reuni pa rindi un homenahe mereci na un persona berdaderamente extraordinario: nos bisawelo, welo, tata y amigo: Jacobo Federico Arends,



mihor conoci como Toty. Su bida tabata un testimonio di dedicacion, pasion y amor pa musica, arte, cultura, y tur loke Aruba ta nifica.” Vivianne a recorda cu Toty a nace na Aruba dia 30 di december 1927.

Su trayecto musical a cuminsa tocando sinfonia di boca na edad di 7 aña y forma un conhuntro musical cu otro muchanan.

Toty tabata un musico autodidactico, reconoci como pianista, arreglista y director di e legendario conhuntro Los Duques, cu a toca pa miembronan di Cas Real di Hulanda durante nan bishita na Aruba.



Ademas, Toty a dirigi y aregla pa e recordado orkestra “Estrella Musical” di Club Estrella di Sta. Cruz.

Riba tereno didactico, Toty a duna lesnan di bajo, piano, cuarta, guitarra, mandolin y percusion na miembronan di “De Trupialen,” un organisacion di cual e tabata un miembro di honor.

Toty a biba hopi aña na Guatemala, unda el a duna un concierto di piano di musica Arubiano na “TGW La Voz de Guatemala” na 1947, cu e resultado cu e mester a duna un di dos concierto. Na Guatemala, riba orgel electronico, el a alegra hopi fiestanan bailable y tambe a siña hopi hende toca orgel electronico.

Pa hopi aña, Toty tabata presidente di hurado pa Festival di Tumba den nos Carnaval y tambe pa hopi Festival di Dande y Folklor di Sr. Harry Croes. E ta e persona cu a inspira y presenta e proyecto didactico “Lor’un Wals” di su recordado amigo, Eddy Bennet, cu e ser auspicia pa Unoca.

Toty no tabata solamente un musico talentoso, pero tambe un defensor incansabel di nos cultura. Su lucha pa habri e porta di Cas di Cultura ta un chempel di su compromiso cu preservacion



y promocion di nos tradicionnan. Danki na su esfuerzo y colaboracion di dos di su amigonan, esta Lio Booi y Maikel Kuiperi, awe nos por disfruta di un espacio dedica na nos cultura.

Toty Arends a fayece dia 20 di december 2017, pero su legado ta hancra den nos. Su amor pa musica y su deseo pa mira otro hende prospera den e campo aki, ta algo cu lo keda pa semper den nos curazon.



Finalizando, Vivianne a bisa: “Toty a siña nos pa balora loke ta di nos, pa aprecia nos musica y pa nunca subestima nos propio talento. Un chempel bibo di esaki ta e ideador y organizador di e evento aki, esta Tula, kende na su turno ta traspasando e legado aki na su alumnonan cu lo presenta awe.”

Su nietanan, hefe di redaccion di Bon Dia Aruba, Pilar Flores, y station manager di XFM, Veronica Avila, conoci entre famia como “Bonnie”, a duna palabra recordando nan welo stima. Avila a reconoce cu tabata un momento hopi emocional pa e famia, ya cu a recorda nan infancia lantando cu Toty, kende nan tabata yama “Abuelazo”.

“E no tabata gusta nada chikito. E no tabata kier ta un ‘abuelito’. E tabata bisa ‘mi ta boso Abuelazo,’ el a recorda. “Esey e tabata pone den tur loke e tabata haci, su musica, su arte, tur cos mester tabata grandioso.” Y e semper tabata kier transmitir e mensahe cu “Aruba no ta chikito, Aruba ta grandioso” cu tur hende.

Flores a bisa cu “musica di Toty ta bay biba pa



semper, y su legado tambe ta pa semper.”

Final di e anochi, Jeandor a comenta cu e canticanan cu a scucha ta un parti chikito di e cantidad valioso di composicion cu Arends a laga atras. “Toty ta di nos,” el a bisa.

Famia di Toty Arends ta manda palabra di



gradicimento na Sr. Eddison “Tula” Mademilia pa a organisa e anochi musical bunita aki y na tur amigo cu a asisti pa nan presencia y cariño, y na Unoca pa facilita e evento aki.



Starbucks Aruba ta celebra 15 aña di logronan

Starbucks Aruba ta orguyoso di por celebra 15 aña ta sirbiendo e comunidad. For di e dia di su apertura na aña 2009, Starbucks a demostra di ta mas cu un simpel koffi-

shop— un lugar placentero unda amistadnan, famia of gruponan por sinta, conecta, relaha y disfruta di bon experiencia di koffie, na bo di 3 luga preferi despues di bo cas y trabao.

Arte di koffie, conecion y comunidad

Starbucks Aruba ta pone enfasis riba crea conecion genuino cu clientenan, introduci bebidanan innovativo y koffienan pa un temporada cu ta eleva e experiencia di un koffiешop. Den e comunidad local, Starbucks a bira un centro pa interaccion di importancia y momentonan special cu ta wordo compaña pa un dushi kopi koffie.

Empoderando nos partnernan: nos mision

Nos partnernan (empleadonan) ta e curason di e compania. Starbucks ta ofrece un ambiente amistoso cu ta inclui diversidad, ser parti, y oportunidad pa crece. Un momento sobresaliente ta e introduccion di Barista Championship, cu ta reconoce e habilidad y pasion di nos partnernan cu ta duna experencianan excepcional tur dia.

E mision di Starbucks ta cu cada kopi koffie, cada conversacion y cada comunidad, nos ta nutri e posibilidad sin limite di conecion humano.

Iniciativanan di sostenibilidad y comunidad

Starbucks Aruba a lansa varios iniciativanan cu a haci un impacto positivo: Transicion pa ekiponan di koffie sostenibel.

Implementacion di e programa “Grounds for our Garden,” reusando e restonan di koffie pa jardin na cas of pa cultivo. Promove uzo di cupsnan reusabel pa reduci deshecho. Renoba tur e tiendanan pa haci nan mas moderno y innovativo. Contribui cu nos comunidad local manera Trampolin pa Trabao por medio di donacion.

Tur e esfuersonan aki ta parti di e “Greener Stores Framework” di Starbucks, cual a certifica mas di 6,000 localidad den mas di 30 mercado globalmente, cu un meta pa logra 10,000 “Greener Stores” pa 2025. For di cuminsamento di 2024, tur localidad nobo di Starbucks den Latino America y Caribe lo sigui e framework aki, demostrando un compromiso firme cu sostenibilidad y conecion cu comunidad.

Crecemento den Futuro

For di 1 localidad back na 2009, Starbucks Aruba avor tin 5 localidad na Aruba y 2 na Corsou. Tin plannan excitante na caminda manera un drive-thru pa tur dos mercado, Starbucks ta sigui pone enfasis pa ofrece experencianan conviniente pa su clientenan pa por disfruta tur momento di nan bebidanan preferi.

Bin celebra nos logronanan

Starbucks Aruba ta invita e comunidad di Aruba

pa uni na e celebracion di 15 aña na Renaissance Marketplace dia 28 di November cu actividad nan henter dia:

6:30 AM – 8:30 AM: Cu bo compra di un bebida size grande lo ricibi “Old Fashioned Donut” gratis (mientras tin den stock)

Durante full dia: Cu cada compra di \$10 of mas lo ricibi un shopping bag di Starbucks (mientras tin den stock).

11:30 AM: Sorteo di “Nutcracker mug” su edicion special

3:00 PM: Coffee Connect & Cake – cera conoci cu e historia di koffie.

3:30 PM: Presentacion di Steelband.

6:30 PM – 7:00 PM: Presentacion di Brassband.

Starbucks Aruba ta gradici su partnernan y clientenan pa forma parti di e aniversario aki durante e ultimo 15 añanan tras di lomba. Nos ta conta cu hopi aña mas celebrando momentonan agradabel hunto cu un copi koffie.

Wanda Broeksema, District Manager di Starbucks Aruba, ta expresa su gratitud na tur su partnernan y clientenan pa forma parti di e aniversario aki, celebrando e dedicacion di nos clientenan fiel y e compromiso inigualabel di nos partnernan cu ta duna nan miho di nan tur dia pa crea e experiencia unico di Starbucks.



THANK YOU FOR THE SUPPORT AND LOYALTY!

WE INVITE OUR STARBUCKS COMMUNITY TO JOIN US ON NOVEMBER 28TH AT STARBUCKS MARKETPLACE TO CELEBRATE WITH OUR AMAZING PARTNERS! EXCITING SPECIALS, LIVE ENTERTAINMENT, AND A MEMORABLE TIME TOGETHER.

LET’S CELEBRATE 15 INCREDIBLE YEARS OF CONNECTION, COFFEE, AND COMMUNITY!